

Wachakalcarta, Pablo lelpox, Corinto paklowaxpijiwliajwa

Pablo lelpox carta Corinto paklowaxpijiwliajwa

1 Xan Pablo, Dios namakafit Jesucristo pej-apóstolliajwan, Dios nanejxasink xot. Xan ampox carta lelx, Timoteo suapich, xamal Jesús pejwuajan naexasitampimliajwa, Corinto paklowaxpijwam. Lelxbej ampox carta puexa Acaya tuajnpijiwliajwa, Jesús pejwuajan naexasitiliajwa. **2** Waj-ax Dios, wajpaklon Jesucristobej, japi kawuajnax xamal kajachawaesliajwa, chiekal duilaliajwam, a sew jiw suapich.

Pablo lelpox xabich nabijatpoxanliajwa

3 Xatis wajpaklon, Jesucristo pax Diosliajwa, graciastis. Waj-ax Dios nakbeltaen. Pomatkoicha nakkajachawaetbejpon, nabijatas wut nejchachaemlaliajwas. **4** Xanal nabijatax wut asaxanliajwa, Dios nakajachawaet nejchachaemlaliajwan. Samata, xanal xajux, naewuajnax wut kajachawaesliajwan, a sew jiw nabijat wut, japibej nejchachaemlaliajwa. Me-ama xanal Dios nakajachawaet, xanalbej naewuajnaxaelen a sew jiw kajachawaesliajwan. **5** Xanal Jesucristo pejjiwan xot, nabijatax wut, Dios nakiowa nakajachawaet nejchachaemlaliajwan. **6** Samata, xanal nabijatax wut, xajux xamal naewuajnalialiajwan xamalbej nejchachaemlaliajwam, asamatkoi nabijatam wut. Xajuxaxaelenbej xamal naewuajnalialiajwan Dios kaes xanaboejalajwam xamal bu'weliajwapon. Samata, nabijatam wut, me-ama xanal majt nabijatax, ja-am wut, nabijatatae' nabijatampoxxal! **7** Xanal matabijax. Xamal nabijatam wut, Dios kajachawaesaxael. Me-ama xanal nakajachawaet wut,

jachiyaxaelbejpon xamalliajwa. Samata, xamal nabijatam wut, Dios kajachawaesaxael nejchachaemlaliajwam. Me-ama xanal majt nabijatax wut, Dios nakajachawaet nejchachaemlaliajwan, jachiyaxaelbejpon xamalliajwa.

8 Takoew, xanal nejxasinkax xamal nejchaxoelaliajwam xabich nabijataxpo, Asia tuajnuhotan wut. Xanal jaxot nabijatax wut, nejchaxoelx: “Xabich nabijatas. Samata, kaes bej machiyaxisalbej nabijataspoxanliajwa. Xatis nakbeyaxaelbejpi” —an xanal, nejchaxoelx wut. **9** Xanal xabich nejchaxoelxbej: “Diachwujnakolax Dios naktapaeibej tupaliajwas” —an xanal, nejchaxoelx wut. Japox ja-aech xanal Dios xabich xanaboejalialjan. Japon xajup tupibej mat-elialjan pejme duilialjan. Samata, xanal amwutjel chiekal matabijax. Xatis wajut wajaxtat xanaboejaxisal, xajupaxisal xot welialjas. **10-11** Asew jiw xabich chachoel wut xanalliajwa, Dios nakiowa nabu'wia. Amwutjelbej Dios nakiowa nabu'wia, chachoel wut xanalliajwa. Xamal Dios kawujnafulam wut xanalliajwa, Dios nakajachawaesfulaxael xanal welialjan. Ja-aech wut, xabich asew jiw taen wut Dios nakajachawaetpo, graciaschiyaxaelpi Diosliajwa.

Ma-aech xot Pablo fulae-el Corinto paklowax poxade

12 Xanal potujnuha jiw naewujnax wut, xamalxotan wutbej, chiekal duilx, me-ama Dios nejxasink. Samata, xanal nejchachaemlax. Xanal chiekal duilx, Dios nakajachawaet xot. Tajut tajaxtat, matabijaxpoxantat, xanal chiekal duila-enil. **13** Xanal cartan lel x wut, jaxot kaes asaxan lela-enil. Samata, japacartan xaljowam wut, chiekal matabijaxaelam. Xan nejxasinkax, cartan xaljowam wut chiekal matabijaliajwam xanal lelpxoxan. **14** Asew jiw, xamalxotpijiw, chiekal matabija xanal isxpoxan. Jesucristo pejme pask wut ampathatasik, nejxasinkax japamatkoi xamal xabich nejchachaemlaliajwam xanal isxpoxanliajwabej. Xanalbej xabich nejchachaemlaxaelen xamal isampoxanliajwa.

15 Samata, nejchaxoelx xamal taeliajwan koleveces. **16** Xan nejchaxoelx ampo: “Macedonia tuajnu poxadax wut, matxoela taeyaxaelen Corinto paklowaxpijiw. Do jawux, baxael, Macedonia tuajnuhot nawia'nax wut, pejme taeyaxaelen Corinto paklowaxpijiw. Do jawut, japixotx wut, japi nakajachawaesaxael Judea tuajnu pasliajwan” —an, nejchaxoelx wut. **17** Pe fulae-enil xamal taeliajwan.

Xan japox nejchaxoelx wut, diachwujnakolax fulaesian xamal taeliajwan. Me-ama xabich asew jiw nejchaxoel asax isliajwa, do jawux, is-elipox, xan jachi-enil. **18** Dios chiekal matabijt xanal naekichachajba-enilpox. Xanal isaxinil wut asax, “Japox diachwujnakolax isaxaelen” —chi-enil. **19** Xan Pablo, Silvano srapich, Timoteobej, xamalxot naewwujnax Jesucristo pejwujajan. Jesucristo, Dios paxulan, is-elasia wut, jumchi-elon: “Xan japox isaxaelen” —chi-elon. **20** Puexa Dios chajia jumdutpoxan, japoxan Jesucristo is xatisliajwa. Samata, xatis Dios jumtis: “¡Xam xabich pachaemam!” —tis. **21** Dios xatis nakkajachawaet kofasamatas Jesús pejwujajan naexasichpox. Dios nakmakanotbej japon pejjiwaliajwas. **22** Dios to'ak Espíritu Santo wajmatpuatanxotaliajwa nakkajachawaesliajwa. Ja-aech wut, xatis matabijas japon pejjiwspox. Samata, xatis chiekal matabijas, Dios chajia jum-aechpox diachwujnakolax japon isaxael japox xatisliajwa.

23 Xan majt nejchaxoelx xamal taeliajwan. Pe fulae-enilfuk, xan nejxasinka-enil xot xamal losliajwan, is-emil xot xan to'axpox. Dios chiekal matabijt xan jum-anpox diachwujnakolax. **24** Xanal matabijax, xamal chiekal naexasitam Jesús pejwujajan. Samata, xanal to'a-enil xamal naexasisliajwam japawujajan. Xanallax nejxasinkax xamal kajachawaesliajwan chiekal nejchachaemlaliajwambej.

2 Samata, nejchaxoelx wut, jum-an xamalliajwa: “Kaes pachaem, tae-elaliajwan Corinto paklowaxpijiw. Xan japi taenx wut, losaxaelenbej. Lotx wut, japi nejxaejwaxaes” —an, nejchaxoelx wut xamalliajwa. **2** Xamal nejchachaemlam wut, xanbej nejchachaemlax. Xamal losaxaelen wut, xamal nejxaejwaxael. Jachiyaxaelam wut, xanbej nanejxaejwaxael, xamal losaxaelen wut. **3** Samata, xan tajut xamal tae-enilfuk. Cartakal asbuan jumch xato'ax xamalliajwa nejxaejwasamata, xamal lotx wut. Nejchachaemlaxinil, xamalxot pa'ax wut, losaxaelen xot. Xan fulaechx wut xamal poxade, xamalbej nejchachaemlaximil. **4** Xan japox carta lelx wut, xabich nejchaxoelx xamalliajwa. Nowxbej. Lela-enil carta xamal nejxaejwaliajwa. Xan lelxlax xamal najut chiekal nejchaxoelaliajwam xamal xabich nejxasinkaxpox.

Pablo Corinto paklowaxpijiw to'apox beltaeliajwapi aton, majt xabich babijax ispon

5 Xan tamach nanejxaejwa-el japon atonliajwa, xamalxot xabich babijax is wut. Puexa xamalbej nejxaejow. Xan

nejxasinka-enil japon aton tasalaliajwan. **6** Puexa xamal japon aton fiatam, babijax is wut. Fiatambejpon culto is-elaliajwa, xamal suapich. Samata, japon koft babijax ispox. Amwutjel japon aton tapaeyaxaelam pejme culto isliajwa, xamal suapich. **7** Amwutjel xamal japon beltaem! Naewuajandebejpon kofsliajwa nejxaejwaspox! Ja-aech wut, japon kofsaxil naexasitpox Jesús pejwuajan. **8** Samata, xamal jum-an japon aton pejme chiekal bukulaliajwam, japon pajut chiekal matabijsliajwa xamal nejxasinkampox japonliajwa. **9** Majt xan lel x wut carta xato'aliajwan xamal poxade, japacarta xato'ax chiekal matabijsliajwan, xamal naexasisaxaelam wut xan xato'axpox japon atonliajwa. **10** Xamal beltaenam wut japon aton, ja-am wut, xanbej japon aton beltaeyaxaelen. Xan japox ja-an wut, Cristo taeyaxael beltaenxpox japon atonliajwa. Xan jachiyaxaelen xamal chiekal matabijaliajwam, xamalbej jachiliajwam. **11** Xatis jachiyaxaes Satanás naknaekichachajbasamata. Xatis chiekal matabijas, ma-aech Satanás, jiw naekichachajbasia wut.

Pablo xabich nejchaxoelpox Titoliajwa, Troas paklowaxxot wuton

12 Pa'ax wut Troas paklowaxxot jiw naewuajnalialjwan Jesús pejwuajan, Dios nakajachawaet xot, xabich pachaemlach naewuajnalialjwan japawuajan. **13** Wajkoewan Tito faena-enil xot Troas paklowaxxot, xan xabich nejchaxoelx Titoliajwa. Samata, Troas paklowaxpijw kijachax, xan fulaelialjwan wut Macedonia tuajnu poxade, jaxotde Tito faenaliajwan.

Dios kajachawaech xot, apóstoles xajupox jiw naewuajnalialjwa Jesús pejwuajan

14 Xanal gracias-an Diosliajwa, japon nakajachawaet xot, Jesús pejjiwan xot. Xanal potuajnuacha naewuajnax wut Jesús pejwuajan, Dios nakajachawaet. Xanal Jesús pejwuajan potuajnuacha jiw naewuajnax atuaj. Me-ama incienso bowas wut, xabich atuaj xabej-ok, ja-aech Jesús pejwuajan naewuajnaxpox. Samata, naexasiti Jesús pejwuajan jum-aechi Jesús pejwuajanliajwa: “Ampawuajan xabich pachaem” —aechi. **15** Dios nejchachaemil, xan jiw naewuajnax wut Jesucristo pejwuajan. Incienso bowas wut, puexa jiw xabejtaena. Ja-aechbej, Jesús pejwuajan xanal naewuajnax wut. Puexa jiw

jumtaen japawuajan. Asew jiw naexasit Dios bu'weliajwas. Asew jiw lax naexasis-el japawuajan. **16** Jiw naexasis-elpi napelsaxael Diosliajwa. Asew jiw lax bu'weyaxaes. Xanal Jesús pejwuajan naexasitx, Dios nakajachawaet xot. Samata, xanal xajux jiw naewuajnalijwan Jesús pejwuajan, japi Dios bu'weliajwas. **17** Asew jiw naewuajan Jesús pejwuajan asbuan jumch mosliajwas. Xanallax jachi-enil. Jiw naewuajnajx wut japawuajan, chiekal naewuajnajx. Kichachajba-enil, Dios nato'a xot, Cristo pejjiwan xotbej.

Pajelwuajantat Dios jumdutpox jiw bu'weliajwa

3 Xamal naewuajnajx wut Jesús pejwuajan, xanal tajutliajwa jumchi-enil: “Xanal kaes pejme pachaeman. Me-ama asew jiw, jachi-enil” —chi-enil tajutliajwa. Asew jiw pat wut xamalxot Jesús pejwuajan naewuajnalijwa, japi carta xapat, asew jiw welelspox japiliajwa. Japox, carta lelspx, jum-aech: “Ampi jiw, Jesús pejwuajan naewuajanpi” —aechox. Samata, xamal chiekal bu'kulam japi jiw, pat wuti xamalxot. Xanal-lax xamalxot patx wut, carta xapas-enil xamal itraelijwan chiekal namatabijaliajwam, chiekal nabu'kulaliajwambej. Xanal nawewe'pa-elbej xamal lelaliajwam carta xanal xalaeliajwan asew jiw poxade chiekal japi namatabijaliajwa, chiekal nabu'kulaliajwabejpi. **2-3** Xamal naewuajnajx Cristo pejwuajan. Samata, amwutjel chiekal duilam. Chiekal duilampox Cristo nejxasink jiw matabijaliajwa. Cristo lela-el cartan jiwliajwa. Lela-elbejpon ia'fachantat. Me-ama chajia Moisés lel, jachi-el Cristo. Pelax Cristo Espíritu Santo to'a lelaliajwa pejjamechan nejmatpuatantat, xamal pajelnejchaxoelaxanliajwa. Samata, amwutjel xamal chiekal duilam xot, asew jiw chiekal matabija xamal Jesucristo kajachawaesfulpox.

4 Xanal matabijax, Dios nato'a xamal naewuajnalijwan Jesús pejwuajan. Dios nakajachawaetbej japoxan isliajwan, Jesucristo pejjiwan xot. **5** Xanal tajut isaxinil Dios pejbichax. Pe nakiowa, Dios nakajachawaet xot, japox bichax nabistax. **6** Dios xanal nakajachawaet jiw naewuajnalijwan pajelwuajan. Japawuajan jiw to'a-esal Moisés chajia lelpox naexasisliajwapi. Japawuajanbej najupa-el, Moisés chajia lelpox suapich. Espíritu Santo nakajachawaet xot, xanal jiw chiekal naewuajnajx, japi jiw chiekal duilaliajwa, me-ama Dios nejxasink. Moisés chajia

lelpo xatis wajut puexa chiekal naexasis-esal. Samata, chiekal napelsaxaes Diosliajwa. Naexasich wutlax pajelwujajan, Espiritu Santo nakkajachawaesfulaxael chiekal duilialiajwas pomatkoicha Diosxotse.

7Dios majt lel tato'laliajwapoxan ia'fachantat. Do jawut, japa-ia'fachan chaxduton Moisés. Jiw japox chiekal puexa naexasis-el. Ja-aech wut, japi pejbw'wujajan Diosliajwa. Napeltbejpi Diosliajwa. Dios chaxdut wut Moisés japa-ia'fachan, Moisés pejxu xabich itliak. Samata, israelitas taeyaxili Moisés pejxu. Moisés xu-itliakpox bijiat toepaful. **8**Kaes pejme pachaem pajelwujajan. Ampamatkoiyan japawujajan naexasich Dios nakbw'weliawja, Espiritu Santo duk xot wajmatpreatanxot. **9**Dios tato'alpoxan pachaem. Jiw pajut matabija kastikaxaespo, xabich babijaxan is xoti. Pe kaes pejme pachaem pajelwujajan Dios nakbw'weliawja babijaxan isaspoxanliajwa. Xatis naexasich xot pajelwujajan, babijaxan isaspoxan Diosliajwa chiekal ajil. **10**Pachaem Dios tato'alpoxan, Moiséstat waeltpro. Pe baxael, Dios wachakalwaeltpro, pajelwujajan, japawujajan kaes pejme chiekal pachaem. Samata, amwutjel majt Dios waeltpro Moiséstat, japox chiekal pachaema-ellejen. **11**Dios tato'alpoxan, waeltpro Moiséstat, japox wujajan pachaem. Pe baxael, wachakalwujajan pat wut, kaes pejme pachaem japawujajan. Japawujajanlax namanaxael pomatkoichaliajwa.

12Xanal matabijax, japawujajan namanaxael pomatkoi-chaliajwa. Samata, xanal tajlewla-el jiw naewujajnalijwan japawujajan. **13**Jiw naewujajnax wut, chiekal chanaekabuanax japawujajan. Chajiakolaxtat Dios tato'alpoxan, waelt Moiséstat. Japawujajan Moisés chiekal chanaekabuanana wut israelitas, japi chiekal jummatabija-el. Japamatkoiyan, Moisés xu-itliak wut, panielbw' xumatakaton israelitas taesamata, Moisés pejxu itliakpox toepafulpox. **14**Moisés naewujajan wut israelitas, japi chiekal jummatabija-el chanaekabuanaspoxan, japi pejnechaxoelaxan, me-ama matakas wut, ja-aech xoti. Amwutjelbej israelitas pamojiw, japi pejnechaxoelaxan, me-ama matakas wut, ja-aech. Israelitas naewujajnabaxot chanaexaljows wut Moisés chajia lelpo, japox chiekal jummatabija-eli. Pelax israelitas pamojiw naexasisaxael wut Jesús tuppox japiliajwa, ja-aech wut, japi chiekal matabijaxael Moisés chajia lelpo. **15**Amwutjelbej israelitas pamojiw chiekal jummatabija-el, xaljow wut Moisés

chajia lelpox. Japi pejnechaxoelaxan, me-ama matakas wut, ja-aech xoti jummatabija-el. **16** Pe nakiowa, asew israelitas naexasit wajpaklon Jesucristo pejwujajan. Samata, japi chiekal matabija, xaljow wut Moisés chajia lelpox. **17** Wajpaklon Jesucristo kaenejchaxoelax, Espíritu Santo suapich. Espíritu Santo duk wajmatpuatanxot. Samata, Espíritu Santo nakkajachawaesful isasamatas babijaxan. Ja-aech wut, nakwewe'pa-el Moisés chajia lelpox naexasisfulaliajwas. **18** Samata, xatis babijax isaxisal. Jatis wut, asew jiw matabijaxael, diachwujnakolax Dios chiekal pachaempon. Espíritu Santo nakkajachawaet xot, xatis chimianejchaxoelaxan. Jatis wut, wajnejchaxoelaxan, me-ama Jesucristo nejchaxoel wut, jachiyaxael.

4 Dios xanal nabeltaen xot, nato'a nabichliajwan japon pej-bichax. Samata, xanal nejchaxoela-enil kofaliajwan. **2** Xanal is-enil padalapoxan. Asaxbej is-enil jiw naekichachajbaliajwan. Dios pejjamechan naewujnax wut, kaes asaxan jiw naewujjna-enil. Dios chiekal matabijt xanal jum-anpoxan, puexa japoxan diach chiekal wujnakolax, puexa jiw pajut chiekal matabijaliajwa. Xanal naewujnaxpoxan xabich pachaem. **3** Naewujnax wut, chiekal naewujnax puexa jiw chiekal matabijaliajwa Dios bu'weliajwas. Pe japi naexasis-el wut xanal naewujnaxpox, ja-aech wut, japi jiw pomatkoicha pajut napelsaxael Diosliajwa. **4** Japi naexasis-el wut japawujajan, pejnechaxoelaxan, me-ama itkua'nik. Pelax naexasiti Jesús pejwujajan, japi pejnechaxoelaxan, me-ama itliak. Samata, Satanás, paklonpon ampathatpijiwliajwa, japon nejxasinka-el jiw naexasisliajwa Jesús pejwujajan. Cristo, pax Dios suapich, kaenejchaxoelax. **5** Xanal naewujnax wut, naewujjna-enil nasitaeliajwam, naxanaboejaliajwambej. Pelax xanal naewujnax xamal sitaeliajwam wajpaklon Jesucristo. Xanal nabistaxpin xamalliajwa, Jesucristo nejxasinkax xot. **6** Dios akaseskolaxtat ampathat is wut, puexa chiekal itkua'nik wut, jawut Dios to'a itliakaliajwa. Jatisbej xatis, Jesús pejwujajan naexasichpis. Amwutjel wajmatpuatantat, me-ama itliak wut, ja-aech, Dios pejjiws xot. Xatis Jesús pejwujajan chiekal matabijas xot, matabijas, Dios xabich pachaempon.

Dios kajachawaetpox pejjiw, xanaboejapi japon

7 Xanal tajut tajaxtat mamnika-enil. Me-ama kuarnat piachliajwa pachaemaxil, ja-anbej xanal. Dios nakajachawaet xot,

xanal mamnikax. Ja-an wut, jiw nejchaxoel xanalliajwa: “Japi japox is wut, pajut pijaxtat is-el. Japox ispi, Dios kajachawaech xot” —aech jiw xanalliajwa, nejchaxoel wut. **8** Xanal nabijatax wut, nejchaemila-enil. Asbuan jumch nejchachaemlax. Xanal asaxanliajwa xabich nejchaxoelx wut, nakiowa Dios xanaboejax nakajachawaesliajwa. **9** Asew jiw babijaxan is xanal nabijasliajwan, Dios pejiwan xot. Pe nakiowa, Dios nakajachawaet. Tamach xanal nawaela-elon. Asew jiwbej nabesia wut, japi xajupa-el, Dios nakajachawaet xot. **10** Xanal fulaech poxade, jaxotde chachoel. Asew jiw nejchaxoel nabeliajwa. Me-ama Jesús boesas, jachisiabejpi xanalliajwa. Samata, puexa jiw pajut matabija, xanal chiekal duilx, Jesús nakajachawaet xot. **11** Pomatkoicha chachoel xanalliajwa, asew jiw nabesia xot, Jesús pejiwan xot. Ja-aech wut, puexa jiw pajut matabija, xanal chiekal duilx, Jesús nakajachawaesful xot. **12** Asew jiw xanal nabesia wut, nakiowa xamal naewuajna x Jesús pejwuajan. Samata, xamal japawuajan naexasitam xot, pomatkoicha duilaxaelam Diosxotse.

13 Dios pejjamechan, chajia lelspx, jum-aech wut, jum-aechox: “Xan xanaboejtax Dios chajia jum-aechpoxan nakajachawaesliajwa. Samata, japox jum-an asew jiwliajwa” —aech Dios pejjamechan, chajia lelspx. Samata, xanalbej nejchaxoelx: “Dios xatis nakkajachawaesaxael” —an xanal, nejchaxoelx wut. Samata, asew jiw naewuajna x Dios pejjamechan. **14** Wajpaklon Jesucristo tɔp wut, Dios mat-echpon pejme dukaliajwa. Samata, xatis chiekal matabijas. Diachwuajnakolax asamatkoi xatis tɔps wut, baxael, Dios nakmat-eyaxaelbej xatis pejme duilaliajwas. Dios nakmat-ia wut pejme duilaliajwas, japon nakbuflaeyaxael japonxotaliajwas. **15** Chajia xan nabijatax wut, asew jiw babijaxan is wut xanalliajwa, xanal nakiowa naewuajna xamal Jesús pejwuajan. Ja-an wut, xabich xamal naexasitam naewuajna x poxan. Dios xabich xamal kajachawaesful. Samata, xamal chiekal naewuajna wut asew jiw Jesús pejwuajan, Dios kajachawaesful japi jiw naexasisliajwa japawuajan. Samata, Diosliajwa gracias-aechi. Japibej chiekal matabija Dios, xabich pachaempon.

16 Samata, xanal nejchaxoela-enil buxkofaliajwan naewuajna x poxan. Kaematkoisful, xanal kaes pakdiachwan wut, ja-an wut, nakiowa kaes chiekal Dios xanaboejafulax. **17** Xanal

nabijatax wüt ampathatat, nakiowa nabistax Jesucristoliajwa. Nabijataxpox piachaxil. Asamatkoi japox chiekal toepaxael. Ja-aech wüt, Dios xanal nachaxdusaxael pachaempox. Japox toepaxil. **18** Xanal nejchaxoela-enil ampathatpijaxan, taenxpoخان. Xanallax nejchaxoelx Diosxotsepoxan, taeyaxisalpoخان. Ampathatpijaxan, taenxpoخان, japoxan toepaxael. Diosxotsepoxan, japoxanlax, toepaxil. Japoxan pomatkoichaliajwa.

5 Thaejtxot bua-at, kaspox, piachliajwa-el. Ja-aechlap-is wajbu'an. Wajbu'an pomatkoichaliajwa-el ampathatat. Xatis chiekal matabijas. Diosxotse toepaxilba, japaba Dios chiekal chaemt asamatkoi xatis duilaliajwas, tups wüt. **2** Xatis laelpas wutfuk, xabich nejxasinkas wajbu'an nakwexaliaxaliajwa pajelbu'analiajwas, duilaliajwas pomatkoicha Diosxotse. **3** Jachiyaxaes puexa xatis, asamatkoi, nakbu'xaliaxaxael wüt. Samata, kaenanula xatis asabu'anaxaes. **4** Xatis laelpas wutfuk, xabich nejxasinkas nakbu'xaliaxaliajwa wajbu'an. Japox jum-an wüt, jumchi-enil: “Xan tajbu'txot nakolsasian” —chi-enil. Pe xatis kaenanula pajelbu'anasias. Pe asamatkoi, tups wüt, duilaxaes toepaxilbu'antat Diosxotse. Wajbu'an, ampathatpijax, amxot kaweta toepaxael. **5** Diosxotse Dios nakwechaemt pajelbu'an xatisliajwa. Samata, Dios to'ak Espíritu Santo xatis wajmatpuatanxotaliajwa. Samata, chiekal matabijas. Diachwujnakolax Dios jumdut xatis wajbu'an, pajelbu'analiajwas.

6 Samata, xanal nejchaxoela-enil kofaliajwan jiw naewuajnapox. Xanal chiekal matabijax. Ampathatat xanal laelpax wüt, me-ama atuajan wüt tajpaklon Jesucristoxot, jan. **7** Amwütjel xanal Jesucristo tae-enil. Pe nakiowa, Jesucristo chiekal xanaboejax nakajachawaesliajwa. Chiekal xanaboejaxbej asamatkoi duilaliajwan Jesucristoxotse. **8** Samata, xanalliajwa kaes pejme pachaem tupaliajwan, duilaliajwan tajpaklon Jesucristoxotse. **9** Samata, laelpax wüt, o, tups wütbej, nejxasinkax xanal isliajwan Dios nejxasinkpoخان. **10** Asamatkoi xanal kaenanula nuilaxaelen Jesucristo pejwujnalel. Japamatkoi japon xanal kaenanula nachaxduiyaxael. Xanal chiekal tanbistax wüt, nachaxduiyaxael xabich pachaempoxan. Pe chiekal nabich-enil wüt japonliajwa, xanal nachaxduiyaxilon. Ja-aech wüt, xanal masox namaeyaxaelen.

**Amwõtjel xatis pachaemspox
Diosliajwa, Jesucristo tıp xot**

11 Xanal chiekal matabijax Jesucristo chiekal sitaeyaxaelenpox, asamatkoi nuilaxaelen xot japon pejwũajnalel. Samata, xanal jiw xabich naewũajna x japibej naexasisliajwa Jesucristo pejwũajan. Dios chiekal matabijt xanal isfulaxpoxan. Xanal nejxasinkax xamalbej chiekal matabijaliajwam xanal isfulaxpoxan. **12** Xamal chapaeix wõt tajut isxpoxan, xanal jumchi-enil: “Xanal kaes pachaeman. Me-ama asew jiw, jachi-enil” —chi-enil tajutliajwa. Xanal japox chapaeix xamal chiekal namatabijaliajwam, nejchachaemlaliajwam xanalliajwa, nakajachawaesliajwam, asew jiw natasala wõt. Xanal natasalapi, japi jiw jum-aech asew jiw chiekal sitaeliajwas. Japi, pachaem wõt, kabũan-aechi. Pe japi pejnechaxoelaxan chaemil. **13** Potũajnucha xanal naewũajna x wõt Jesús pejwũajan, asew jiw nakaewa najum-aech xanalliajwa: “Japi jiw na-acha” —na-aechi xanalliajwa asbũan jumch. Diachwũajnakolax xanal, na-achax wõt, ja-an, nabistax xot Diosliajwa. Diachwũajnakolax xanal na-acha-enil. Potũajnucha xanal naewũajna xot Jesús pejwũajan, japox pachaem xamalliajwa. **14** Cristo nanejxasink xanal. Samata, pomatkoicha nabistax japonliajwa. Nejchaxoelxbej: “Cristo tıp wõt cruztat, tıp puexa xatistiajwa. Samata, Diosliajwa, Cristo suapich, cruztat tıps wõt, jatis. Samata, Cristo mot babijaxan isaspoxanliajwa” —an xanal, nejchaxoelx wõt Cristo tıppoxliajwa. **15** Cristo tıp puexa jiw bu'weliajwa, japi kaes isasamata pajut isasiapoxan. Japilax isfulaxael Cristo nejxasinkpoxan. Japon tıp wõt, mat-echbejpon pejme dukaliajwa japi jiwliajwa. **16** Samata, xanal amwõtjel nejchaxoela-enil babijax isliajwan. Me-ama asew jiw, naexasis-eli Jesús pejwũajan, nejchaxoel babijaxan isliajwa, xanal jachi-enil amwõtjel. Majt xanal isx babijaxan Jesucristoliajwa. Pe amwõtjel, jasox chiekal nejchaxoela-enil. **17** Jesús pejwũajan naexasitpon, japon aton pajelnejchaxoelax, padujnejchaxoelaxan koft xoton. Ja-aech wõt, nejchaxoelon pachaempoxankal.

18 Dios nakajachawaet xot, xanal pajelnejchaxoelaxan. Samata, amwõtjel xanal pachaeman Diosliajwa, Cristo tıp xot xatistiajwa. Dios nabũxta'a xanal jiw naewũajnalialjwan japi naexasisliajwa Jesús pejwũajan, pachaemaliajwapi Diosliajwa.

19 Jesucristo t̄up cruztat puexa jiwliajwa, japi pachaemaliajwa Diosliajwa, naexasit w̄uti Jesús t̄uprox. Ja-aech w̄ut, Dios beltaeyaxael japi jiw babijaxan ispoxanliajwa. Japaw̄ajan xanal Dios nab̄xto'a jiw naew̄ajnalijwan. **20** Xanal Jesucristo pejiwan xot, naew̄ajnajx japon pejw̄ajan. Xamal naew̄ajnajx w̄ut, me-ama Dios pajut naew̄ajan w̄ut, ja-an xanal. Samata, xanal j̄um-an Jesucristo pijaxtat xamal chiekal pachaemaliajwam Diosliajwa. **21** Jesucristo babijax is-el. Pe xatis babijaxan isaspoxantat, Jesucristo, me-ama babijaxan is w̄ut, ja-aechon Diosliajwa. Samata, Jesucristo kimatamatlas cruztat. Samata, amw̄tjel xatis b̄'w̄ajanjisal Diosliajwa, naexasich xot Jesucristo t̄uprox xatisliajwa.

6 Xanal nabistax xot Diosliajwa, xamal j̄um-an mastaesamatam Dios beltaenpox babijaxan isampoxanliajwa. **2** Dios pejjamechan, chajia lelspx, j̄um-aech w̄ut, j̄um-aechox Dios j̄umchiyaxaelpox, asamatkoi Dios jiw beltaeyaxaelpoxliajwa:

“Xan xamal kajachawaesaxaelen, pat w̄ut tajmatkoi xamal b̄'weliawjan” —aech Dios. ¡Naewe'e! ¡Ma amw̄ut, ampamatkoi, xamal Dios b̄'weyaxael!

3 Xanal nejxasinkax chiekal nabichliawjan Diosliajwa. Ja-an xanal, asew jiw japox taen w̄ut, japiwej chiekal naexaxisliajwa Dios pejjamechan. Ja-aech w̄ut, japi jiw j̄umchiyaxil: “Dios pejjamechan pachaema-el” —chiyaxili. **4** Xanal chiekal isx Dios pejbichax, jiw japoxan taen w̄ut pajut chiekal matabijaliajwa xanal Dios pejjiwanpox. Samata, xabich nabijatax w̄ut, asaxan nawewe'p w̄utbej, puexa pachaema-el w̄utbej xanal isliawjan, xanal nakiowa boejtaliasfulax. **5** Naeyatat namatw̄ajnselt w̄utbej, jiw jebatat najia w̄utbej, xabich asew jiw palala w̄ut, naboesia w̄utbejpi, puexa japoxanliajwa xanal xabich boejtaliasfulax. Xabich nabistax w̄utbej tajut natataeflaliajwan, asamadoi chiekal moejs-enil w̄utbej, Dios pejjamechan jiw naew̄ajnajx xot, asamatkoiyan xabich litaxaelax w̄utbej, puexa japoxanliajwa xanal xabich boejtaliasfulax. Puexa japoxan natapat w̄ut, nakiowa jiw naew̄ajnafulax Dios pejjamechan. Ja-an w̄ut, jiw pajut chiekal matabija xanal Dios pejjiwanpox. **6** Jiw pajut chiekal matabijaliajwa xanal Dios pejjiwanpox, asax babijax is-enil. Chiekal matabijaxbej chimiaw̄ajan, Jesús pejw̄ajan, jiw naew̄ajnalijwan. Xabich piach boejtaliasfulaxbej, asew jiw babijaxan is w̄ut xanallijwa. Asew jiwliajwa xanal isxbej

pachaempoxan. Jiw chiekal naewuajnaexbej, Espíritu Santo naka-jachawaet xot. Chiekal nejxasinkaxbej asew jiw. **7** Naewuajnaexbej diachwuajnakolaxpoxkal Jesús pejwuajanliajwa, Dios nakajachawaesful xot. Isxbej pachaempoxan asew jiwliajwa, xanal babijaxan namalechasamata. Japoxan babijaxan potuajnaexbej xajur. **8** Asamatkoi jiw nasitaen. Asamatkoi jiw nasitae-el. Asamatkoi asew jiw chimiajamechan jum-aech xanalliajwa. Asew jiwlix jum-aech babejjamechan xanalliajwa. Jum-an wut diachwuajnakolaxpoxan, asew jiw japoxan jumtaen wut, xanalliajwa jum-aechi: “Japi kichachajbapijiw” —aechi asbuan jumch xanalliajwa. **9** Jiw, chiekal xanal namatabijapi, japi xanal nataen wut, me-ama namatabija-el wut, ja-aechi xanalliajwa. Asamatkoi xabich chachaelbej xanalliajwa, asew jiw nabesia xot. Pe xanal nakiowa duilafulax. Asamatkoiyan asew jiw xabich nakastikabej. Pe nakiowa, tupa-enil. **10** Asamatkoiyan, asew jiw babijaxan is wut xanalliajwa, xanal nanejxaejow. Pe nakiowa, nejchachaemlax tajnejchaxoelaxantat. Xanal kijinil. Pe nakiowa, xanal naewuajnaexpi, japi jiw, me-ama kimaenk wut, ja-aechi Diosliajwa, japi naexasit xot xanal naewuajnaexpoxan. Ampathatat xanal kijinil wut, ja-an. Pe Dios nakajachawaet xot, xanal xabich tejew, toepaxilpoxan.

11 Takoew, xamal Corinto paklowaxpijwam, xanal puexa jum-anpoxan, japoxan diach chiekal wuajnakolax. Samata, tulaela chiekal jum-an japoxan xamal chiekal matabijaliajwam. Xanal xabich nejxasinkax xamal. **12** Xanal kofa-enil xamal nejxasinkaxpox. Amwutjel xamallax xanal chiekal nanejxasinka-emil. Me-ama majt nanejxasinkam wut, jachi-emil. **13** Xamal naewuajnaex wut, me-ama kaen aton paxi naewuajan wut, ja-an xanal xamalliajwa. ¡Xanal nanejxasinkde! Me-ama xanal xamal nejxasinkax wut, ¡ja-amsfuldebej xanalliajwa!

Xatis, me-ama Dios pejtemploba wut, jatispox

14 ¡Xamal, Jesús pejwuajan naexasitampim, Jesús pejwuajan naexasis-eli suapich, nabej nakjiye! ¡Japi suapich, piach nabej nabichbej, kaenejchaxoela-emil xot! Xamal isam pachaempoxan. Pelax japi jiw is pachaema-elpoxan. Japoxan najupa-el. Itliakax, itkuatax suapich, najupa-el. Ja-amlap-is xamal. Babijaxan ispi suapich, xamal, japi suapich, najupa-emil. **15** Cristo kaenejchaxoelaxa-el, Satanás suapich. Ja-aechbej Jesús

pejwñajan naexasiti. Xamal kaenejchaxoelaxa-emil, asew jiw, Jesús pejwñajan naexasis-eli suapich. **16** Ja-aech Dios pejtemplobaliajwa, ídolo pejtemplobaliajwabej. Japakolebachanxot ajil kaenejchaxoelaxpox. Xatis, me-ama Dios pejtemploba wut, jatis. Dios pajut chajia jum-aech japoxliajwa:

“Xan tajjiwxot dukaxaelen. Japi suapich, nanñamsaxaelenbej. Xan japi pejDios wulxaelen. Japibej tajjiw wulxael” —aech Dios.

17 Samata, Dios pejme jum-aech:

“Jiw babijaxan is xamal duilamxot. Samata, ¡jaxot nakolim asalel duilaliajwam! ¡Xamal nabej is babijaxan, japi jiw ispoxan! Ja-am wut, xamal tajjiwaxaelam.

18 Xan nej-axnaxaelen xamalliajwa. Xamalbej taxi wut, jachiyaxaelam” —aech Dios, xabich mamnikpon.

7 Takoew, japox Dios chajia nakjumdut xatis chiekal matabijaliajwas. Samata, ¡chiekal duilaxaes babijaxan isasamatas Diosliajwa! Babijaxan majt isas, japoxan chajia nejchaxoels xot isliajwas, ¡puexa japoxan chiekal kofaxaes, duilaliajwas, me-ama Dios nejxasink!

Pablo nejchachaemilpox Corinto paklowaxpijiwliajwa

2 ¡Xamal nabej kofe' xanal nanejxasinkampox! Xamalxotan wut, chinax babijax is-enil kaen atonliajwa. Tabejs-enilbej asan aton pejnechaxoelax japon babijax isliajwa. Chinax kaen aton naekichachajba-enilbej. **3** Xanal japox jumchi-enil xamal losliajwan. Chajia jum-an xamal pomatkoicha nejxasinkaliajwan, hasta xan tux wut ampathatat. **4** Xan matabijtax, xamal naexasisaxaelam cartaxot lelxpox. Xan jiw chapaeix xamal isampoxan. Japoxan chapaeix wut, xabich nejchachaemlax xamalliajwa. Xan nabijatax wut, nakiowa xabich nejchachaemlax, xamal nejchaxoelx xot.

5 Macedonia tuajñuxot xanal pa'ax wut, chiekal damlathula-enil, naewñajnafulax xot. Amwutjelbej nakiowa chiekal damlathula-enilfuk. Potñajñucha jiw naewñajnax wut Jesús pejwñajan, puexa chiekal pachaema-el xanalliajwa. Potñajñucha chiekal pachaema-el xanalliajwa. Xabich asew jiw nabu'alot Jesús pejwñajan, naewñajnax wut. Samata, nejchaxoelx: “Japi nawetabejsaxael naewñajnaxpox” —an, nejchaxoelx wut. **6** Dios kajachawaet jiw nejxaejwaspi, japi jiw nejchachaemlaliajwa. Japon

xanalbej nakajachawaet nejchachaemlialijwan, Tito pa'an xot. 7 Tito pa'an wut, xanal nejchachaemlax. Titobej xabich nejchachaemil xamallialijwa. Samata, xanalbej nejchachaemlax. Japon xanal nachapaei xamal xabich nataesiampox. Nachapaeibejpon xamal xabich nejxaejowpox xanallialijwa, majt ja-aechpoxanlialijwa. Nachapaeibejpon xamal nakajachawaesasiampox, asew jiw nabu'alot wut naewuajnapoxlialijwa. Puexa japoxan jumtaenx wut, xan xabich nejchachaemlax xamallialijwa.

8 Carta, matxoelalelxpox, xato'ax wut xamal poxade, japox carta xaljowam wut, xamal nejxaejow. Xan japox carta lel xwutuk, nejchaxoelx: "Xan nejchachaemla-enil ampox carta lelialijwan, Corinto paklowaxpijw xaljow wut, nejxaejwaxaes xoti" —an, nejchaxoelx wut. Do jawux, xamal japox carta xaljowam wut, diachwuajnakolax xamal nejxaejow. Pe nejxaejowpox piacha-el. Samata, xan nanejxaejwa-el, japox carta lel xwut. 9 Xan nejchachaemla-enil xamal nejxaejowpox, japox carta xaljowam wut. Xanlax nejchachaemlax, xamal nejxaejow wut, kofam babejnechaxoelaxan. Pe amwutjel, isfulam Dios nejxasinkpoxan. Samata, Dios xabich nejchachaemil xamallialijwa. Carta xato'ax wut xamallialijwa, nejnechaxoelaxan tabejs-enil. 10 Kaen aton nejxaejwas wut babijaxan ispoxanlialijwa, Dios xajup japon aton beltaelajwas. Ja-aech wut, japon aton nejxaejwaspox wetoepaxaes. Asan atonlax, babijaxan ispon, kofs-el wut babijax, ja-aech wut, japon aton Dios beltaeyaxisal. 11 Xamal xabich nejxaejow, xaljowam wut carta japon aton xamalxot xabich babijax isponlialijwa. Do jawux, xamal isam Dios nejxasinkpox japon atonlialijwa. Samata, Dios xabich nejchachaemil xamallialijwa. Xamal chiekal matabijam, ma-am majt xamal. Japon aton fias-emil, xabich babijax is wut. Jawutbej xamal nalala japon atonlialijwa, nejlewla xot Dios kastikaxael xot xamal. Samata, japon aton fiatam xot, asew jiw matabija xamal kaenechaxoelaxa-emilpox, japon aton ispoxlialijwa. Amwutjel xamal xabich nataesiam. 12 Japox carta lel xwut, xan lela-enil asbuan jumch xamal to'aliajwan japon aton kastikaliajwam. Lela-enilbej japox carta japon aton, pax suapich, chaemslialijwa babijax. Dios matabijt, ma-aech xot lel xwut japox carta. Xan lel xamal chiekal najut matabijaliajwam, diachwuajnakolax xanal nanejxasinkampox. 13 Samata, xanal nejchachaemlax, majt nanejxaejow xamallialijwa.

Xanal kaes pejme xabich nejchachaemlax, taenx wut Tito xabich nejchachaemilpox, xamal chiekal bu'kulam xoton. **14** Tito fulaeliajwa wut xamal poxade, xan japon jum-an xamalliajwa: “Corinto paklowaxpijiw chiekal naexasisaxael ampox carta, xato'axpox” —an Titoliajwa. Diachwujnakolax xamal japox carta xaljowam wut, xan lelpxox chiekal naexasitam. Samata, xanal, Tito suapich, nejchachaemlax xamalliajwa. Me-ama xan chajia jum-an Titoliajwa, diachwujnakolax japox ja-aech. **15** Japon Tito nejchaxoel wut xamalliajwa, nejchaxoelon, ma-am xamal, japon naexasitam wut, xamal tato'al wuton. Nejchaxoel-bejpon, ma-am xamal, chiekal bu'kulam wut, sitaenam xoton. Samata, amwutjel xamal kaes pejme xabich nejxasinkon. **16** Xan matabijtax, xamal isampoxan puexa chiekal pachaem. Samata, xabich nejchachaemlax.

Jesús pejuwajan naexasiti ofrenda owapox kajachawaesliajwa kijila, Judea tuajnujpijiw

8 Takoew, xamal chapaeyaxaelen chiekal matabijaliajwam, ma-aech Dios, kajachawaet wut Macedonia tuajnujpijiw, japi naexasiti Jesús pejuwajan. **2** Japi jiw nabijat, asew jiw babijaxan isas wut japiliajwa, Jesús pejuwajan naexasit xoti. Pe nakiowa, japi jiw nejchachaemil. Japi jiw, xabich kimaenka-el. Pe nakiowa, japi jiw ofrenda owa kajachawaesliajwa asew jiw. Japixot asew xabich owa. Me-ama kimaenk wut, ja-aechi. **3** Xan tajut chiekal taenx, japi owa wut. Jawut nejchaxoelx: “Japi kaes xabich owa, owa wuti ofrendaliajwa” —an, nejchaxoelx wut. Japi japox to'a-esal. Japi japox pajut is, isasia xot. **4** Xanalliajwa japi jiw xabich najum-aech: “Xanalbej natapaem ofrenda owaliajwan kajachawaesliajwan naexasiti Jesús pejuwajan, Jerusalén paklowaxpijiw” —aech japi jiw xanalliajwa. **5** Xanal nejchaxoelx wut, jum-an: “Japi jiw kijil xot, xabich bej owaxaelbejpi kaeyaxach” —an, nejchaxoelx wut. Pe nakiowa, japi xabich owa. Japilap matxoela nawoeya Diosxot isfulaliajwa Dios tato'alpoxan. Do japoxwux, xanal najum-aechi: “Xamal nejxasinkam wut xanal natato'laliajwam, xanal natato'alde! Xanal japoxan isfulaxaelen, me-ama Dios nejxasink” —aechi xanalliajwa. **6** Xanal taenx wut Macedonia tuajnujpijiw kaenanula ofrenda owaliajwa, jawut xanal Tito to'ax xamal poxade. Tito jum-an: “Xam majt kaja-chawaetam Corinto paklowaxpijiw, tuadut wuti ofrenda owax

kajachawaesliajwapi Jerusalén paklowaxpijiw. ¡Xam amwut pejme fulaem japi ofrenda owax kito'aliajwam, kitoesliajwabejpi!” —an xan Titoliajwa, xamal poxaliajwa wuton. **7**Xamal kaes chiekal pachaemam, duilam wut Diosliajwa. Chiekal xanaboejambej Dios. Chiekal matabijambej Dios pejjamechan. Samata, chiekal xajupam asew jiw naewuajnalijwam Dios pejjamechan. Nejasinkambej chiekal isliajwam Dios pejbichaxan. Xanal xabich nanejasinkambej. Xamal ja-am xot, ¡kaes pejme owim ofrenda kajachawaesliajwam Jerusalén paklowaxpijiw!

8 Xamal jum-an wut: “Macedonia tuajnapijiw xabich plata owa ofrendaliajwa Jerusalén paklowaxpijiwliajwa” —an wut, japox jumchi-enil xamal to'aliajwan, me-ama japi, jachiliajwam. Japox jum-an xamal chiekal matabijaliajwam. Xamal owam wut ofrenda, me-ama Macedonia tuajnapijiw, ja-am wut, asew jiw taeyaxael xamal diachwujnakolax Dios nejasinkampim. **9** Xamal matabijam, wajpaklon Jesucristo nakkajachawaet, xatis naknejasink xot. Wajpaklon Jesucristo pas-el wutfuk ampathatasik, xabich kimaenkon. Puexa tato'albejpon. Jawux ampathatat xabich nabijat Jesucristo. Me-ama kijilan xabich nabijat wut, ja-aech Jesucristo xamal kajachawaesliajwa. Ja-aech xoton, xamalliajwa asamatkoi pachaemaxael Diosxotse.

10 Chajia, asawaech wut, xamal tuaduwam plata owax ofrendaliajwa kajachawaesliajwam Jerusalén paklowaxpijiw. Xamal ja-am, xabich nejasinkam xot japox isliajwam. Ampamatkoiyan pachaem xamal plata owax kitoesliajwam. Japox jum-an, xan tajut nejchaxoelxpo. **11** Majt xamal xabich kajachawaesiasiam Jerusalén paklowaxpijiw. ¡Amwutjel xamal kajachawae'e! ¡Owim ofrenda xajupampoxtat! **12** Xamal owam wut puexa xajupampoxtat, ja-am wut, Dios nejchachaemlaxael xamalliajwa. Nejew kaesupich owam wut asew jiw kajachawaesliajwam, ja-am wut, Dios nejchachaemlaxael xamal asew jiw kajachawaetampoxliajwa. Dios to'a-el, xamal xabich ajil wut nejew owaliajwam asew jiw kajachawaesliajwam.

13 Xamal to'a-enil puexa nejew owaliajwam ofrendaxot, kajachawaetam wut kijila. Puexa nejew owam wut, ja-am wut, xamal najutliajwa namaeyaxil. **14** Xan nejasinkax xatis nakaewa nakajachawaesliajwas, asew jiwliajwabej, japi wewe'pas wut. Amwutjel xamal xajupam kajachawaesliajwam kijila, Jerusalén

paklowaxpijiw. Asamatkoi, xamalliajwa ajil wut, japibej xamal kajachawaesaxael. Ja-aech wut, kaen xamalxot wewe'paxisal wewe'paspoخان. **15** Japoxliajwa Dios pejjamechan, chajia lelspx, jum-aech wut, jum-aechox: “Aton xabich naxaeyaxan notpon pajutliajwakal, japon aton wenamana-esal. Asan, aton, naxaeyaxan kaeswapich notpon, japon aton wewe'pa-esal” —aech Dios pejjamechan.

Tito fulaechpox Corinto paklowax poxade, kolenje pejnachalan swapich

16 Xan nejxasinkax xamal kajachawaesliajwan ofrenda owampox kitoesliajwam. Titobej Dios pijaxtat japox nejchaxoel. Samata, gracias-an Diosliajwa. **17** Samata, Tito to'ax xamal taeliajwa, kajachawaesliajwabejpon ofrenda owampox kitoesliajwam. Japon ow-aech. Japon pajut pijaxtat xamal xabich taesiabejpon.

18 Tito, pejnachalan swapich, to'ax. Tito pejnachalan matabijas puexa Jesús pejwujajan naexasiti, Macedonia tujnupijiw. Sitaensbejpon puexa japi jiw, japon chiekal jiw naewujajan xot Jesús pejwujajan. **19** Tito pejnachalan, to'as puexa Jesús pejwujajan naexasiti, Macedonia tujnupijiw, japon, xan swapich, fulaeliajwa Jerusalén paklowax poxade. Ofrenda xalaeliajwan wut Jerusalén paklowaxpijiwliajwa, japon nachalaxael, kaes chiekal japi nejchachaemlaliajwapi Diosliajwa. Japi pajut chiekal matabijaxaelbej xatis kajachawaesiasipox, nakaejiws xot. **20** Xanal ofrendaplata pin-iat xafolx wut Jerusalén paklowaxpijiwliajwa, japon buflaeyaxaelen, asew jiw xan najumchisamata: “Pablo kaeswapich dijanbej ofrendaplata pajutliajwa” —nachisamata asew jiw xanliajwa. **21** Dios matabijt xanal puexa ofrenda chaxdusaxaelenpox. Pe nakiowa, nejxasinkax puexa jiw chiekal pajut matabijaliajwa xanal puexa ofrenda chaxduiyaxaelenpox japi jiw.

22 Tito, pejnachalan swapich, kaes asanbej to'axaelen, Jesús pejwujajan naexasitpon. Japon xabich nakajachawaet. Amwutjel japon xamal xabich kajachawaesasia, wultaen wuton Jerusalén paklowaxpijiw kajachawaesasiampox. **23** Xamalxot asew jiw wujnachaemt wut Titoliajwa, xamal jumchiyaxaelam: “Japon Tito, Pablo pejnachalan. Japon xanal nakajachawaet” —chiyaxaelam. Kolenje, Tito nakfulaeyaxaespi,

xamalxot asey jiw wuajna chaemt wut japi kolenjelajwa, xamal jumchiyaxaelam: “Ampi kolenje to'as naexasiti Jesús pejwuajan, Macedonia tuajnapijiw. Ampi kolenje chiekal pachaem. Samata, asey jiw chiekal sitaen Cristo” —chiyaxaelam japi kolenjelajwa. **24** Japi, tres poejiw, xamalxot pa'a wut, chiekal bu'kulaxaelam japi pajut chiekal matabijalajwa xamal nejxasinkampox. Ja-am wut, puexa jiw, naexasiti Jesús pejwuajan, chiekal matabijaxael xamal diachwuajnakolax nejxasinkam naexasiti Jesús pejwuajan. Japox wultaen wuti, chiekal matabijaxael xan majt jum-anpoxan xamalliajwa, japox diachwuajnakolax, xamal puexa jiw nejxasinkampox.

Asey jiw owapox ofrenda Jesús pejwuajan naexasitilajwa

9 Diachwuajnakolax we'pa-el, xan lelx wut xamal pejme kito'aliajwan ofrenda owaliajwampox naexasitpilajwa Jesús pejwuajan, Jerusalén paklowaxpijwliajwa. **2** Xan chiekal matabijtax xamal xabich japi kajachawaesasiampox. Samata, xabich nejchachaemlax xamalliajwa. Chajia Macedonia tuajnapijiw jum-an xamal Corinto paklowaxpijwamliajwa: “Acaya tuajnapijiw, Corinto paklowaxxot duilpi, chajia, asawaestat, owapi ofrenda kajachawaesliajwa Jerusalén paklowaxpijw. Amwutjelbej nakiowa owafuki ofrenda” —an xamalliajwa. Dolis jawut, Macedonia tuajnapijiw wultaen xamal kajachawaesasiampox Jerusalén paklowaxpijw. Do jawut, Macedonia tuajnapijiwbej ofrenda owa kajachawaesliajwapi Jerusalén paklowaxpijwliajwa. **3** Samata, amwutjel Tito to'ax xamal poxade, pejnachala suapich, xamal kajachawaesliajwa, ofrenda owampox kitoesliajwam Jerusalén paklowaxpijwliajwa. Xan tajpasax wuajna, xamal ofrenda owax kitoes-emil wut, ja-am wut, japox pachaemaxil xanliajwa, xamalliajwa chajia jum-an xot Macedonia tuajnapijiwliajwa. **4** Xamal poxaxaechan wut, Macedonia tuajnapijiw xan nakfulaen wut, xamal toes-emil wutfuk ofrenda owampox, ja-am wut, japox pachaemaxil xanliajwa. Japox jachiyaxael, xamalliajwa chajia jum-an xot: “Japi xabich kajachawaesasia Jerusalén paklowaxpijw” —an xot. Japox pachaemaxilbej xamalliajwa, ofrenda owampox kitoes-emil wutfuk. **5** Samata, nejchaxoelx Tito wuajna to'aliajwan, Tito pejnachalabej. Japi xamal kajachawaesaxael kamta kitoesliajwam ofrenda

owampox. Xan pasax wuajna, puexa xamal chiekal kitoesaxaelam ofrenda owax nejmach chalakaliajwa. Jasox najut isaxaelam, nejxasinkam xot. Japox isam wut, inabej is, xamal kito'ax xot!

6 Xamal nejchaxoelam wut, inejchaxoelde ampo! Chaellulx muthapon, wenakolas wut, kaeyaxach wenakolas. Pelax pinjiyax lul muthapon, xabich pin-iat wenakolas. Jachiyaxaelbej ofrenda owam wut asew jiwliajwa. Pin-iat owam wut kaja-chawaesliajwam asew jiw, ja-aech wut, asamatkoi asew jiw xamal pin-iat chaxduiyaxaelbej. **7** Samata, xamal kaenanula owasiam wut, iowim! Owam wut, jawut, nejchaxoelam wut, inabej nejchaxoele': "Xan diachwuajnakolax nejxasinka-enil japi jiw kajachawaesliajwan. Pe nakiowa, nakito'a xot, kajachawaetxlejen" —nabej aeche', nejchaxoelam wut! Dios nejxasink, aton chaxduw wut nejchachaemlaxtat asew jiw. **8** Dios xajup chaxduiliajwa puexa xamal wewe'ppoxan. Samata, xamalliajwa puexa wewe'paxil. Japoxan wenamaeflaxaelbej kajachawaesliajwam jiw kijila. **9** Dios pejjamechan, chajia lelspos, jum-aech wut, jum-aechox:

"Aton pejew chaxduw wut kijila, Dios nejkiowaxil. Japon aton mosaxaes pachaempoxan. Japoxan pomatkoichaliajwa. Japoxbej toepaxil" —aechox.

10 Dios is naebaechpa-uthanpi jiw muthaliajwa. Isbejpon pafupi jiw pelaliajwa. Dios kajachawaet wut, muthasi chiekal ti'sfulbej. Do jawux, ti't wut, pachaembej xaeliajwa. Jachiyaxaelbej, Dios xamal chaxduw wut puexa wewe'ppoxan. Samata, xajupaxaelambej kajachawaesliajwam asew jiw. **11** Ja-aech wut, Dios xamal xabich chaxduiyaxael. Samata, xamal xajupaxaelam asew jiw xabich chaxduiliajwam, japi wewe'pas wut. Xamal ofrenda owaxaelam xanal xaeliajwan Jesús pejwuajan naexasitiliajwa, Jerusalén paklowaxpijiwliajwa. Japa-ofrenda japi chaxdutex wut, graciaschiyaxaelpi Diosliajwa. **12** Asew, Jesús pejwuajan naexasiti, xamal kajachawaetam wut, kajachawaesaximil wewe'paspoxankalliajwa. Kajachawaesaxaelambej japi jiw xabich graciaschiliajwapi Diosliajwa. **13** Jasoxtat ofrenda owam wut kajachawaesliajwam Jerusalén paklowaxpijiw, japi chiekal matabijaxael, diachwuajnakolax xamal chiekal naexasitam Jesús pejwuajan. Japi jumchiyaxaelbej Diosliajwa: "Xam xabich pachaemam" —chiyaxaelpi, xamal ofrenda pin-iat owam xot

japiliajwa, puexa a sew, Jesús pejwujajan naexasitiliajwa-bej. **14** Samata, japi jiw Dios kawujajna xael xamalliajwa, xabich nejxasink xoti xamal. Ja-aech wut, japi pajut matabijaxael Dios xabich xamal kajachawaetpox. **15** Dios paxulan to'a ampalthasik tupaliajwa xatisliajwa. ¡Japox xabich pachaem! Samata, xatis puexa graciastis Diosliajwa. Xatis japox chiekal chanaekabu analiajwas tampoel.

**Pablo xajupox tato'laliajwa Jesús pejwujajan
naexasiti, japon apóstol xot**

10 Xan, Pablo, chiekal xamal jumchisian asaxan. Me-ama Jesús ampalthatat chiekal jum-aech, xanbej jachisian xamalliajwa. Xamalxota-enil wut, a sew jiw nabuwujajanpaei wut, jum-aechi: “Pablo amxot duk wut, naknaewujajan wutbej, pejlewla wut, ja-aechon. Pelax atuj wuton, carta lel wut xatis naknaewujajnalijwa, pejlewla-el wut, ja-aechon” —aech a sew jiw, xanliajwa nabuwujajanpaei wut. **2** Xamal jum-an amwutjel kofaliajwam babijaxan isampoxan. Japoxan kofam wut, asamatkoi xamalxot patx wut, losaxinil. Xamalxot a sew jiw jum-aech xanliajwa: “Pablo duka-el, me-ama naexasiti Jesús pejwujajan duil wut, jachi-elon. Japon duk, me-ama Jesús pejwujajan naexasis-eli duil wut, ja-aechon” —aech a sew jiw xanliajwa. Jiw jum-aechpi japox xanliajwa, xan pa'ax wut, japi jiw losaxaelen. **3** Diachwujajnakolax xanal chiekal jiwankal. Me-ama a sew jiw, xanalbej, ja-an. Jesús pejwujajan naewujajna wut, me-ama, Satanás suapich, nabax. Pe nabe-enil kirixtat. Me-ama ampalthatpijw kirixtat naba, xanal jachi-enil. **4** Xanal, me-ama ampalthatpijw, naba wut espadatat, jachi-enilbej. Xanalax Dios nakajachawaet xot, xajupx Satanás malechaliajwan. Dios nakajachawaesful xotbej, toesaxaelen jiw natasalapoxan. **5** Dios nakajachawaesful xotbej, buxmalechaxaelen a sew jiw pajutliajwa najum-aechpi: “Xanal kaes pejme pachaeman. Me-ama a sew jiw, jachi-enil” —aechpi pajutliajwa. Japi jiw asax jum-aech, xan jiw naewujajna wut a sew jiw matabijasamatapi Dios. Xan japi jiw buxmalechax wut, ja-an wut, a sew jiw chiekal naexasisaxael Jesús pejwujajan. **6** Xamal chiekal naexasitam wut xanal to'axpox, ja-am wut, puexa, a sew jiw, xanal naexasis-elpi, japi kastikaxaelen.

7 Xamal chiekal taenam jiw kabuan-aechpoxan. Pe diachwujnakolax xamal matabija-emil japi nejchaxoelpoxan, pejmatpumatantat ma-aechbejpi. Asew jiw xanal nabu'wujajanpaei. Japi pajut jum-aech asew jiwliajwa: “Xanal nabistax Cristoliajwa” —aechi pajutliajwa. Japi jiwbej pajut matabijaxael, xanalbej nabistax Cristoliajwa. 8 Xamal nejchaxoelambej xanliajwa: “Pablo pomatkoicha nakchapaei Dios makafichpox apóstolliajwa” —ambej, xamal nejchaxoelam wut xanliajwa. Diachwujnakolax Cristo nato'a xamal naewujalnaliajwan japon kaes chiekal xanaboejalijwam. Cristo nato'a-el tabejsliajwan xanaboejam-pox japonliajwa. Samata, xan tadala-el jiw jumchiliajwan: “Dios namakafitpox apóstolliajwan” —chiliajwan. 9 Xan nejxasinka-enil xamal nejchaxoelaliajwam xanliajwa: “Pablo xatis nakbeljasasia cartaxot lelpoxtat” —chiliajwam. Xan carta lela-enil asbuan jumch xamal japox nejchaxoelaliajwam bel-jasax. 10 Asew jiw xanliajwa nakaewa najum-aech asbuan jumch: “Pablo carta xato'a wut xatisliajwa, xabich mamnik wut, ja-aechon. Japacarta xabich tampoelbej xatis chiekal jummatajibaliajwas. Pelax Pablo xatisxot naknaewujajan wut, mamnika-el wut, ja-aechon. Chiekal naewujajna-elbejpon” —aech asew jiw nakaewa xanliajwa. 11 Japi jiw, japox jum-aechpi xanliajwa, chiekal matabijaxael xan isaxaelenpox japiliajwa, xamalxot pa'ax wut. Me-ama cartaxot lelxpox jum-aech, japoxlap pejme xan jachiyaxaelen japi jiwliajwa.

12 Japilax nejchaxoel pajutliajwa: “Xatis kaes pejme pachaems. Me-ama asew jiw, jachi-esal” —aechi, nejchaxoel wut. Japi pajut asew jiw chapaeibej, is wut pachaempoxan, asew jiw sitaeliajwas. Japoxan chapaei wut, japi, me-ama nejliakla wut, ja-aechi. Samata, chapaeipoxan pachaemael. Xanal nejxasinka-enil japox nejchaxoelaliajwan. 13 Dios xanal nato'a isliajwan japon pejbichax. Samata, Dios nato'alel xan jiw naewujajnax Jesús pejwujajan. Dios nato'abej xamal, Corinto paklowaxpijwam, naewujalnaliajwan. Xamal chapaeix wut xanal isxpoxan, kaes pejme asaxan chapae-enil xamal kaes nasitaeliajwam. Dios nato'apoxankal isliajwan, japoxankal xamal chapaeix. 14 Samata, xanal Dios nato'a xot, xamalxot patx wut, naewujajnax chimiawujajan, Jesucristo pejwujajan. Xanallap matxoela naewujajnax japawujajan xamalxot, asew jiw naewujajna-el wutfuk. 15 Asew naexasit Jesús pejwujajan, asew

jiw naewwajnas xot. Samata, japiliajwa xanal jumchi-enil: “Japi naexasit Jesús pejwujajan, xanal naewwajnax xot” —chi-enil. Xanal kaes naewwajnasian, xamal kaes Jesucristo xanaboejalijawam. Dios nato'apoxkal, japoxkal xanal nabichaxaelen. **16** Naewwajnax buxtoetx wut xamalxotde, jawux, fulaeyaxaelen asapaklowaxan poxade, kaes pejme atuj poxade. Jaxotan wut, xanal naewwajnaxaelen Jesús pejwujajan. Xanal nejxasinka-enil naewwajnalijawan asew jiw wujana chajia naewwajanxot.

17 Jiw chapaei wut pajut ispoxanlijaw asew jiwlijaw, ja-aech wut, chapae yaxaelbeji Dios kajachawaechpox japoxan isliaw. Ja-aech wut, asew jiw jumtaens wut, japi jiw sitae-yaxael Dios. Japi chapae yaxil pajut ispoxanlijaw asbuan jumch asew jiw sitaelijwas. **18** Chinax kaen aton pajutlijaw jumchiyaxil: “Xan isxroxan xabich pachaem” —chiyaxil pajutlijaw. Dios jum-aech wutlax japon atonlijaw: “Xam isampoxan xabich pachaem” —aech wut, japox xabich pachaemaxael.

Pablo tasalapox apóstoles-elpi, patpi Corinto paklowaxxot

11 Asew jiw pajut ispoxan chapaei, asbuan jumch asew jiw sitaelijwas. Xanbej tajut isxroxan xamal chapaeix wut, jchiekal naewe'e! **2** Jasox xamal jum-an, xamal xabich nejxasinkax xot. Me-ama xamal nejxasinkam Dios, xanbej ja-an, xamallijaw. Nejxasinkax xamal nejxasinkalijawam Cristo. Me-ama pawis nejxasink pamalkal, xamalbej ja-amde, nejxasinkam wut Cristo! **3** Chajiakolaxtat Eva naekichachajbas Satanás. Samata, xan xamallijaw nejchaxoelx: “Satanás bej naekichachajbaxaesbeji. Japi naekichachajbas wut, kofaxaeli Cristo nejxasinkpox” —an, nejchaxoelx wut xamallijaw. **4** Asew jiw, xamalxot patpi, japi jiw pat naewwajnalijaw asawujajan, Satanás to'asrox. Japawujajan najupa-el, Jesús pejwujajan suapich, xanal naewwajnaxpox. Japi xamal naewwujajan wut, chiekal naewetam. Xanal naewwajnaxpox Espíritu Santo nejmatpuatanxotalijaw, japawujajanlijaw japi jiw naewwujajan asawujajantat. Xanal naewwajnaxpoxbej, chimiawujajan, Dios xamal bu'weliajwa, japi japoxlijaw naewwujajan wut, naewwujajanbej asawujajantat. **5** Japi pat wut xamalxot, nejchaxoelam japi jiwlijaw: “Diachwujanakolax ampi jiw kaes pejme pachaem, apóstoles xot” —am, nejchaxoelam wut. Japi pajutlijaw nejchaxoelbej: “Xatis kaes pejme pachaems. Me-ama asew jiw jachi-esal” —aechi,

nejchaxoel wut pajutliajwa. Xanlax japox nejchaxoela-enil: “Japi kaes pejme pachaem. Me-ama xan, jachi-el” —chi-enil, nejchaxoelx wut japi jiwliajwa. **6** Xan tajut chiekal matabijtax. Jiw pejwujnalel naksiyax wut, chiekal naewujajna-enil. Me-ama aton xabich matabijtpon naewujajan wut, xan jachi-enil. Pe nakiowa, xan tajut matabijtax, xamal chiekal chanaekabuanax. Samata, xamal chiekal matabijam naewujajnaxproxan, chiekal naewujajnax xot Jesús pejwujajan.

7 Xamal naewujajnax wut Dios bu'weliyajwa xamal, mat-omwuljoe-enil. Ja-an wut, ¿xamallijwakat isx babijax? ¡E! Xan japox isx wut, is-enil babijax. Xan na-it-ele-el wut, nabistax tajut wujajsliajwan tejew. **8** Xamal naewujajnax wut Jesús pejwujajan, asatujajuchanpijiw, Jesús pejwujajan naexasiti, japi plata naxto'a wuti xanliajwa, xan kifitx japaplata tejew wujajsliajwan. Ja-an wut, xan kaes xajux xamal naewujajnalialjwan. **9** Xamalxotx wut, asax nawewe'p wut, xamal wuljoe-enil nachaxduiliajwam. Jesús pejwujajan naexasiti, Macedonia tujajupijiw, nachaxduw xan nawewe'pproxanliajwa. Ja-an, xan dukx wut xamalxot taliasasamatan. Jachiyaxaelenbej, pejme xamalxotx wut. **10** Xan naexasitx diachwujajnakolax, Cristo pejwujajan. Samata, xan jum-anpox, diachwujajnakolax. Xan jum-an wut: “Acaya tujajupijiw mat-omwuljoe-enil, naewujajnax wut Jesús pejwujajan” —an wut, kaen aton nabuxfiasaxil, japox jum-an wut. **11** Asew jiw jum-aech xamal chiekal jumtaeliajwam xanliajwa: “Pablo xamal nejxasinka-el. Samata, nejew plata kifis-elon” —aechi. Japox diachwujajnakolaxa-el. Dios chiekal matabijt xamal nejxasinkaxpox.

12 Pejme xan patx wut xamalxot naewujajnalialjwan, xamal mat-omwuljoeyaxinil. Me-ama majt, jachiyaxaelen. Asew, xamalxot patpi, japi xamal mat-omwuljow, naewujajan wuti Jesús pejwujajan. Samata, japi jiw jumchiyaxil: “Xanal isx puexa, me-ama Pablo is” —chiyaxil japi jiw xanliajwa. **13** Japi diachwujajnakolax apóstoles-el. Xamal jum-aech wuti: “Xanal apóstoles” —aech wut, japi japox jum-aech xamal naekichachajbalialjwa. Japi xamalxot naewujajan wut, me-ama xanal, Cristo pejjiwan wut, apóstoles, ja-aech japi jiw xamal naekichachajbalialjwa. Pe xanal tajjiwa-el japi jiw. **14** ¿Xamal nabej nejchaxoelanuile!, apóstoles-elpi is wut, me-ama xanal apóstol, ja-an wut! Satanásbej xajux itliakaliajwa, me-ama Dios

pej-ángeles, jachiliajwa jiw naekichachajbaliaw. **15** Samata, Satanás pejiwbej xajwɁ, me-ama jiw pachaempi wɁt, kakɁanchiliajwa. Japi ja-aech xot, asamatkoi Dios xabich kastikaxaesi, babijaxan is xot.

Pablo xabich nabijatpox, apóstol xot

16 Xan pejme jɁm-an. ¡Xamal nabej nejchaxoele' xanliajwa: “¡Pablo na-acha, pajut ispoxan chapaei xoton!” —nabej aeche', nejchaxoelam wɁt! Xamal nakiowa xanliajwa jasox nejchaxoelam wɁt, natapaeyaxaelam xan jɁmchiliajwan tajut ispoxanliajwa, me-ama na-achax wɁt, jachiliajwan, japoxan jɁm-an wɁt. Asew, me-ama apóstoles, ja-aechi, pajut ispoxan chapaeipi xamal naekichachajbaliaw, japi sitaeliajwam. Samata, xanbej tajut ispoxan chapaeiyaxaelen xamal nasitaeliajwam. **17** Tajpaklon nato'a-el xan tajut isxpoxan xamal chapaeliajwan. Pe nakiowa, xan me-ama na-achanan, jasonan, tajut ispoxanliajwa xamal chapaeiyaxaelen xan nasitaeliajwam. **18** Xamalxot patpi pajut ispoxankal xamal chapaeipi. Japi bɁxdala-el chapaeliajwa japoxan xamalxot, japi chiekal xamal sitaeliajwam. Samata, xanbej tajut isxpoxan chapaeiyaxaelen xamal chiekal xan nasitaeliajwam. **19** Xamal najut nejchaxoelam: “Xatis kaes pejme chiekal matabijas” —am, nejchaxoelam wɁt. Pe diachwɁajnakolax xamal chiekal matabija-emil. Xamal nalala-el japiliajwa, japoxan chapaei wɁti. Xamal chiekal naewetam na-acha, japi pat wɁt xamalxot naekichachajbaliaw. **20** Xamalxot patpi, japi jiw xamal tato'al. Samata, xamal, japi pamakam wɁt, ja-am. Japi jiw xamal naekichachajba nejew wenosliajwa. Xamal naekichachajba wɁt, xamal nalala-el. Japi xamal mastaen wɁt, asaxan is wɁtbejpi, xamal nalala-el japiliajwa. **21** Xanallax jasox is-enil, xamalxotan wɁt.

Xamalxot patpi, pajut ispoxan chapaeipi xamal japi chiekal sitaeliajwam. Xanbej tajut isxpoxan chapaeiyaxaelen xamal chiekal nasitaeliajwam, me-ama na-achan, jachiliajwan. **22** Japi pajut jɁm-aech xamal sitaeliajwam: “Xanal judíosan” —aechi. Xanbej, judíos-atonan. Japi pajut jɁm-aechbej: “Xanal israelitan, Dios pejiwan” —aechi. Xanbej israelita-atonan, Dios pejatonan. Japi pajut jɁm-aechbej: “Xanal Abraham pamojiwan” —aechbejpi. Xanbej Abraham pamonan. **23** Japi pajut jɁm-aechbej: “Xanal Cristo pamakjiwan” —aechi. Xan kaes pejme

Cristo pamaknan. Me-ama japi, jachi-enil. Japox tajutliajwa jum-an wut, me-ama na-achan, ja-an xamalliajwa. Xan xabich kaes pejme nabistax Cristoliajwa. Me-ama japi, jachi-enil. Jan wut, pin-iaveces asew jiw namatwujaselt. Me-ama japi jiw, xan jachi-enil. Jiw jebachantat asew jiw xan najia pin-iaveces. Me-ama japi jiw, xanbej jachi-enil. Pin-iaveces asew jiw mox pejnaboebesabej. **24** Cinco veces judíos najaelt wut, nakastika. Do jawutbej, namatwujaselt treinta y nueve veces jiw xaselsmuatat. **25** Pejme tres veces najaelt wut, naeyatat namatwujabe'bala. Kaeveces jiw ia'tat nadadap namatkaejabaliajwa. Tres veces barkamatat chafolx wut, chabu'lax. Kaeveces chabu'lax wut, kaematkoi chatuilx mintat. Kaemadoi mintat chanlianx-bej. **26** Xan xabich nanuamtax jiw naewuajnalialjan Jesús pejuwajan. Asamatkoi, chafolx wut minlel, xabich chachoel xanliajwa. Asamatkoi, putlel nanuamtax wut, xabich chachoelbej xanliajwa nawenatkowasamata nuamfatat. Asamatkoi xabich chachoelbej xanliajwa jiw tajtuajnuapijw babijax nawe-isasamata. Asamatkoi chachoelbej xanliajwa asatuajnuchanpijw babijax nawe-isasamata. Asamatkoiyan chachoelbej xanliajwa paklowaxanxotx wut, pajilaxxotx wutbej, marxotx wutbej. Asamatkoiyan xanliajwa chachoelbej, jiw naexaxis-elpixotx wut Jesús pejuwajan. **27** Asamatkoiyan xabich damlax, xabich nabistax xot. Asamatkoiyan moejs-enil madoi. Asamatkoiyan xan xabich litaxaelax. Xabich minsilabej. Asamatkoiyan piach naxae-enil. Asamatkoiyan xabich nabijatax, xabich thunk wut, nawewe'p xot naxoe.

28 Xamal chapae-enil pejme kaes asaxan nabijataxpoxan. Amwutjelbej nabijatax, nejchaxoelx wut Jesús pejuwajan naexasitiliajwa, kaenanula paklowaxanxot duilpiliajwa. **29** Jesús pejuwajan naexasiti mamnika-el wut Dios chiekal xanaboejapoxan, ja-aech wut, japi nejxaejwas wut, xanbej nanejxaejow japi jiwliajwa. Aton, Jesús pejuwajan naexasitpon, asew jiw naekichachajbas wut, japon babijax is wut, xanbej xabich nanejxaejow japon atonliajwa. Xabich talalabej japi jiwliajwa, naekichachajba xoti japon aton. **30** Asan nabuxto'a wut asew jiw tajut jumchiliajwanpox, ja-aech wut, chapaejaxaelen japi jiw pajut chiekal matabijaliajwa xan chiekal mamnika-enilpox. **31** Xatis Diosliajwa, Jesucristo pax, jumtis: “Dios, xam xabich pachaeman” —tis pomatkoicha. Japon chiekal matabijt xan



©DCC

(2 Corintios 11.25–28)

jum-anpox diachwajnakolax. **32** Damasco paklowax ia' chaxjajialsprox, xabich pinjiyax. Xabich athubejprox. Japox xajajialsprox pejfafachan jiw leliajwa japapaklowaxxot. Damasco paklowaxpijin, gobernador, japon makafich rey Aretas gobernadorliajwapon japapaklowaxxot. Xan pa'ax wut Damasco paklowaxxot, japon gobernador kito'a pejsoldaw xan najaelsliajwa. Jawut jum-aechon: “¡Paklowaxfafachan wesfulde, Pablo nakolt wut jaelsliajwam!” —aech gobernador pejsoldawliajwa. **33** Ja-aech wut, naexasiti Jesús pejwajjan, pinjiyax canastotat nachakakofan ventana tathoetleldik, ia' xajajialsleldik. Ja-aech wut, xan wiax Damasco paklowaxxot.

**Pablo chapaeipox masoxtat
taenpoxliajwa wajpaklon Jesús**

12 Wajut isaspoxan asew jiw chapaeis wut japi jiw naksitaeliajwa, japox pachaema-el wajutliajwa. Pe

nakiowa, xamal chapaeyaxaelen xan masoxtat tajut taenxpox, xamal chiekal jũmtaeliajwam wajpaklon Jesús natulaelt pox xanxot. Japon natulaelt xanxot chiekal tajut taeliajwan, xan isfulaliajwan japon nejxasinkpoxan. **2-3** Catorce waechanlisox Dios nabũ'folpox athũ poxase, japon duk poxase. Xan naxtae-enil, nabũ'fol wũt Dios. Jalape. Matabijs-enil, tathũalnan nabũ'fol wũt, o, taj-aelkal bũ'fol wũt. Kaen Dios japox chiekal matabijt. **4** Xan chiekal matabijtax Dios nabũ'folpox, japon duk poxase. Jaxochax wũt, jũmtaenx asew jiw majt jũmtae-eljamechan. Dios natapae-el japox asew jiw chapaeliajwan. **5** Xan tajut chapaesian wũt, japox chapaeyaxaelen asew jiw nasitaeliajwa, athũ poxase nabũ'folpox. Pe japox xan jiw chapaeyaxinil. Xanlax chapaeyaxaelen chiekal mamnika-enilpoxan. **6** Xan xabich chapaeyaxaelen wũt Diosxotse taenxpoxan, me-ama na-acha-enil wũt, jachiyaxaelen, diachwũajnakolax xot japoxan. Pe japoxan chapaeyaxinil jiw nasitaesamata. Xan nejxasinkax jiw nasitaeliajwa Diosliajwa isxproxanliajwa, asew jiw naewũajnapoxanliajwabej. **7** Dios natapaei pomatkoicha tajbũ't nawexaenkaliajwa, japoxtat nabijasliajwanbej. Ja-an wũt, Satanás, me-ama pokcho-etat, na-e'atat, naxũa'at wũt, ja-aech tajbũ't nawexaenkaliajwa. Jasox ja-aech, Dios natapaei xot xan nejchaxoelasamatan: “Dios na-itpaei pachaempoxan xan taeliajwan japonxotse. Samata, xan kaes pejme pachaeman. Me-ama asew jiw, jachi-enil” —chisamatan, tajut nejchaxoelx wũt. **8** Xan tres veces wajpaklon Jesucristo kawũajnx naboejthũsliajwa japox waxae. **9** Pe naboejthũs-elon. Jawũt Jesucristo najũm-aech: “Xam wewe'p tajnejxasiyaxkal. Xam boejthũsaxinil puexa jiw matabijaliajwa xam chiekal mamnika-emilpox” —aech wajpaklon. Samata, xan chiekal nejchachaemlax, jiw pajut matabijaxael xot. Xan puexa chiekal isx, Cristo nakajachawaesful xot. **10** Chiekal mamnika-enil wũt, nakiowa nejchachaemlax. Asew jiw jũm-aech wũtbej babejjamechan xanliajwa, Jesús pejuwũajan naexasitx xot, xan nakiowa nejchachaemlax. Asaxan nawewe'p wũtbej, xan nejchachaemlax. Asew jiw babijaxan is wũtbej xanliajwa, naexasitx xot Jesús pejuwũajan, xan nakiowa nejchachaemlax. Pachaema-el wũtbej nabichliajwan Cristoliajwa, xan nakiowa nejchachaemlax. Jiw pajut taen wũt xan mamnika-enilpox, ja-aech wũt,

japi pajut chiekal matabija, puexa xan japoxan isx Cristo pejkajachawaesaxtat.

Pablo xabich nejchaxoelpox Corinto paklowaxpijiwliajwa

11 Xan chapaeix tajut isxpoxan. Me-ama na-achan pajut ispoxan chapaei wut, xan ja-an. Jasox chapaeix, xamal asew jiw chiekal chapae-emil xot xan isxpoxan. Xanlax pachaema-enil. Pe xan kaes pachaeman. Diachwujnakolax apóstoles-elpi, xamal naewetampi, xan jachi-enil. **12** Xamalxot dukx wut, naewujnax pin-iamatkoivan, Dios nato'a xot. Isxbej koechaxan. Samata, xamal najut chiekal matabijam, diachwujnakolax xan Cristo pej-apóstolan. **13** Xan dukx wut xamalxot, puexa chiekal isfulax xamalliajwa, me-ama asapaklowaxanpijiw, Jesús pejwujajan naexasitiliajwa, puexa chiekal isx. Ja-an wut, xan asax is-enil xamal taliasliajwan. Xamal wuljoe-enilbej nakajachawaesliajwam nawewe'ppoxanliajwa. Jasox ja-an wut, xamalliajwa chiekal pachaema-el wut, xan nabeltaem!

14 Xan thiltax xamal pejme taeliajwan. Amwut xamal taeyaxaelen wut, japoxtat tres vecesaxael taenxpox xamal. Pejme xamalxot pa'ax wut, xamal wuljoeyaxinil plata nakajachawaesliajwam. Me-ama majt wuljoe-enil plata, pejme xan jachiyaxaelen. Xan nejxasinka-enil nejew plata. Nejxasinkax-lax xamal chiekal naexasisliajwam Dios. Paxjiw chaxduw plata paxiliajwa. Paxi plata chaxdui-el paxjiw. Xamal, taxi wut, ja-am xanliajwa. Samata, plata xamal wuljoe-enil nachaxduiliajwam. **15** Xan nejchaxoelx xamalliajwa: “Corinto paklowaxpijiw wewe'pas wut kajachawaesax, puexa xan tejew toesaxaelen japi kajachawaesliajwan. Xan xajurx wut, puexa isaxaelenbej japi kajachawaesliajwan” —an, nejchaxoelx wut xamalliajwa. Xamal kaes nejxasinkax wut, xamallax xan nanejxasinkampox toepaful.

16 Xamalxotx wut, xan asaxan nawewe'p wut, xamal wuljoe-enil. Pe nakiowa, asew jiw nakaewa najum-aech xanliajwa: “Pablo xatis naknaekichachajba plata nakwenosliajwa” —na-aechi nakaewa xanliajwa. **17** ¿Xamalkat nejchaxoelam xanliajwa: “Pablo to'api xatisleldin, kaen japixot plata not Pabloliajwapi” —amkat xamal xanliajwa, nejchaxoelam wut? Japox nejchaxoelam wut, diachwujnakolaxa-el. **18** Tito to'ax wut xamal taeliajwa, jawut asan, Jesús pejwujajan naexasitpon,

to'axbej fulaeliajwa, Tito swapich. Japamatkoi, ¿Titokat xamal naekichachajba? ¡Japon naekichachajba-el! Xan, Tito swapich, chiekal kaenejchaxoelaxan. Samata, Titobej xamal wuljoeyaxil plata.

19 Xamal xanliajwa nejchaxoelambej: “Pablo puexa japoxan pajut pijaxtat nakjum-aechbej xatis tasala-elaliajwas” —ambej, nejchaxoelam wut xanliajwa. ¡El! Japoxliajwa xan jumchi-enil. Xan puexa jum-an, Cristo nejxasinkpoxan, Dios nejchachaemliajwa. Xamal nejxasinkax. Samata, puexa japoxan jum-an xamal kajachawaesliajwan, kaes Dios chiekal xanaboejalijawam. **20** Xan xabich nejchaxoelx xamalliajwa, ma-am xamal amwutjel, duilam wut. Chiekal bej duila-emilbej, me-ama xan nejxasinkax xamal duilaliajwam. Xamal nakaewa bej nalotambej. Bej nusa-siowlambej. Nalala wut, xabich piach bej nalalabej. Kaenanula xabich bej nejchaxoelambej nejewkalliajwa. Puexa xamal bej jum-ambej babejjamechan asew jiwliajwa. Xamal asew jiw maliach bej bu'wujjanpaeyambej. Bej nejchaxoelambej: “Xatis kaes pejme pachaems. Me-ama asew jiw, jachi-esal” —bej ambej, nejchaxoelam wut. Xamal duilam wut, chiekal bej duila-emilbej. Samata, xamal bej nasaladuilambej. Ja-amsfulam wut, xamalxot patx wut, xan xabich talalaxael japoxanliajwa. Samata, xamal xabich losaxaelen. **21** Samata, xan tadalaxael Diosliajwa, xamal amwutjel babijaxan isam xot. Samata, amwutjel xabich nejchaxoelx xamalliajwa. Asew jiw xamalxot chajiakolaxtat babijaxan is. Amwutjelbej asew xamalxot nakiowa japoxan babijaxan isfuluk. Asew watho' bu'moejtbejpi. Kaes asaxan babijaxan isfulbejpi, japi jiw padaeyax wejisal xot. Xamalxot patx wut, japi jiw isful wut babijaxan, xan noeyaxaelen japoxanliajwa, xabich nanejxaejwaxael xot.

Pablo kitoesaxaelpox carta lelux Corinto paklowaxpijwliajwa

13 Amwut, xamal taeyaxaelen wut, ampoxtat tres veces wulxael. Dios pejjamechan, chajia lelspox, jum-aech wut, jum-aechox babijaxan ispiliajwa: “Kaen aton babijax is wut asew jiwliajwa, japi jiw tasala wuti japon aton kastikaliajwas, japi jiw buflaeyaxael kolenje, o, tres aton, chiekal taenpikal, japon aton babijax is wut” —aechox. **2** Majt asaviaje wut, xamalxot pa'ax wut, asew jiw fiatx babijaxan ispoxan

kofaliajwa, japi bu'wujajnilaliajwa Diosliajwa. Xamalxot asew jiw naewujnaxbej babijaxan isasamata. Amwutjel, atuajan wut, xamal pejme fiatx babijaxan isasamatam. Pejme xamal taenx wut, nakiowa babijaxan isfulam wut, ja-amsfulam wut, xamal beltaeyaxinil. **3** Jasoxtat xamal kastikaxaelen chiekal matabijaliajwam xan diachwujnakolax Cristo nabuxto'aponan. Cristo mamnika-ele-el. Pe xamal kajachawaet wuton, ja-aech wut, xamal chiekal matabijam japon pejpamamax. **4** ¡Diach japox ja-aechdo! Cristo, me-ama mamnika-el wut, ja-aechon, cruztat kimatamatlas wut, tuj wutbejpon. Pe Dios mat-echpon pejme dukaliajwa. Me-ama Cristo mamnika-el wut, ja-anbej xanal apóstoles. Xanal tajut mamnika-enil. Xanal, Cristo swapich, kaemutan. Samata, chiekal duilafulax xamal kajachawaesliajwan, Dios nakajachawaesful xot.

5 ¡Xamal najut chiekal nejchaxoelde, diachwujnakolax xamal chiekal naexasitam wut Cristo pejuwajan, o, chiekal naexasis-emil wutfuk! Ja-am wut, diachwujnakolax najut chiekal matabijaxaelam, ma-am xamal, Cristo pejuwajan naexasitam wut. **6** Xan nejchaxoelx xamalliajwa: “Corinto paklowaxpijiw chiekal nejchaxoel wut, ja-aech wut, japi pajut chiekal matabijaxael diachwujnakolax apóstolanponanpox” —an, nejchaxoelx wut xamalliajwa. **7** Xanal Dios kawujnax xamal babijaxan isasamatam. Nejchaxoela-enil xamalliajwa: “Corinto paklowaxpijiw chiekal duil wut, diachwujnakolax puexa jiw chiekal nakmatabijaxael xatis Cristo pejjiwspis” —chi-enil, nejchaxoelx wut. Jasox nejchaxoela-enil. Xanal nejxasinkax xamal isliajwam pachaempoxankal. Jiw xanliajwa jumchiyaxael wut: “Pablo pachaema-el apóstolliajwa” —chiyaxael wuti, xan nejchaxoelaxinil japoxliajwa. **8** Pe xan asbuan jumch xamal chanaekabuanaxaelen Jesús pejuwajan, diachwujnakolaxpox, jiw naexasisliajwa. Xan asax jumchiyaxinil jiw itsalsasamatan japi naexasisliajwa japawujajan. **9** Samata, xanal nejchachaemlax, asew jiw najum-aech wut xanalliajwa: “Japi, Jesús pejuwajan chanaekabuanapi, mamnika-el wut, ja-aechi” —aech wut asew jiw xanalliajwa. Xanallax nejxasinkax Dios xanaboejampox chiekal mamnikaliajwa. Xanal Dios kawujnafulax xamal kaes chiekal Dios xanaboejaliajwam. **10** Xan ampox carta lelax xamal poxade xato'aliajwan kofaliajwam babijaxan isampoxan tajpasax

wɔajna. Ja-am wɔt, xamal losaxinil. Dios nato'a xamal tataeflaliajwan. Samata, xamalxot pa'ax wɔt, xan nejchachaemlaxinil xamal losliajwan. Xanlax nejxasinkax xamal kajachawaesliajwan, kaes chiekal Dios xanaboejalaiajwan.

11 Takoew, ampox carta kitoesliajwan wɔt, lelaxaelen ampoخان. Xan nejxasinkax xamal nejchachaemlaliajwan. Nejxasinkaxbej nejchaxoelaliajwan isliajwan pachaempoxan. Nejxasinkaxbej naewesliajwan naewɔajnaxpox, xamal chiekal nejchachaemlaliajwan. Nejxasinkaxbej kaenejchaxoelaxliajwan chiekal duilaliajwan. Ja-am wɔt, Dios naknejxasinkpon, nakkajachawaetponbej chiekal duilaliajwas, asey jiw sɔapich, japon xamalxotaxael. **12** Xamal, Jesús pejwɔajan naexasitam-pim, natamejlam wɔt, ɟchiekal nakaewa nasaludam! **13** Puexa jiw, naexasiti Jesús pejwɔajan, saludos xato'a xamalliajwa.

14 Xan Dios kawɔajnax wajpaklon Jesucristo xamal kajachawaesliajwa. Dios kawɔajnaxbej xamal asey jiw nejxasinkaliajwan, me-ama Dios xamal nejxasink, jachiliajwambej xamal. Dios kawɔajnaxbej Espírítu Santo pomatkoicha puexa xamalxotaliajwapon.